





# **Акафист**

## **святой преподобномученице**

### **Евгении Римской**

#### **Кондак 1**

---

Избранная добродетелей подвижнице, учения Христова проповеднице Евгение, похвальная восписуем ти по достоянию. Ты же, яко имущая дерзновение ко Господу, от всяких бед и напастей свободи и наследниками Царствия Небеснаго содейай нас, да зовем ти: Радуйся, святая преподобномученице Евгение, монашествующих украшение.

#### **Икос 1**

---

Ангелом уподобилася житием твоим, святая преподобномученице: от младых бо лет чистоту души и тела соблюла еси, Христу любовь усердно последовала еси и достигла еси совершенства духовнаго. Сего ради слышиши от нас сия достождождныя похвалы:

Радуйся, от юности Богом предизбранная.

Радуйся, благоволением Сына Божия от нечестия земнаго Рима, ко благочестию горняго Иерусалима призванная.

Радуйся, родителей твоих дщерь благородная и града Александрии прозябение.

Радуйся, пламенную любовь ко Христу явившая.

Радуйся, Его ради самоотвержение чудное показавшая.

Радуйся, богатство мира сего возненавидевшая.

Радуйся, мужески его радости отвергшая.

Радуйся, нищетою духовною и верою обогатившаяся.

Радуйся, чистоту девственную Христа ради непорочно сохранившая.

Радуйся, Жениху Нетленному девство твое обручившая.

Радуйся, иноческое житие возлюбившая.

## **Кондак 2**

---

Видящи непостоянство красот мира сего, тлению причастных, благородная дево Евгение, возлюбила еси блага нетленные, вечныя,

Христом обетованная, ихже постигнути всем сердцем возжелала еси. Того ради умыслила еси просити родители твоя отпустить тя во едину от весей их, прохлады ради и шествуя на колеснице со евнухи и рабы, егда услышала иноков, поющих: «Вси бози язык бесове. Господь же небеса сотвори», - высокому благородию вперилася еси, дом, родителей и богатство оставити потщалася еси, да Христу угодна будеши и возможеши невозбранно пети Ему: Аллилуиа.

## **Икос 2**

---

Разумом совершенным познала еси истиннаго Бога и Его ради еллинскую мудрость отвергла еси, к подвигом иноческаго жития рачение имеющи, немощь естества женскаго отложила еси: возвращающуюся бо колесницу ко граду своему, в дом отеческий, оставила еси, власы главы своея постригши и в мужеское одеяние облекшися, вкупе со евнухами своими во обитель притекла еси, идеже Божиим Промыслом святителя Еллия узрети сподобилася еси. Сего ради ублажаем тя сице:

Радуйся, земле благая, приявшая семя небеснаго учения.

Радуйся, свыше удостоившаяся  
Божественного просвещения.

Радуйся, произрастившая клас живыя веры.

Радуйся, мирскаго треволнения избежавшая.

Радуйся, звездо, возсиявшая во тьме  
языческаго нечестия.

Радуйся, град отечествия твоего оставившая,  
да Вышняго Града наследие обрящещи.

Радуйся, богатство земное нивчтоже  
вменившая.

Радуйся, нищету самоизвольную себе  
избравшая.

Радуйся, послания апостольския добре  
уразумевшая.

Радуйся, чрез них Господа познавшая.

Радуйся, служить Ему во иночестве  
изволившая.

Радуйся, яко уневестила еси душу твою  
Жениху Христу.

Радуйся, святая преподобномученице  
Евгение, монашествующих украшение.

## Кондак 3

---

Силу Христа Спасителя, влекущую к Нему, уразумела еси, святая дево Евгение, душею и телом сему влечению последовала еси, и яко Ангел, на крилех добродетелей к Нему воспарила еси, непрестанно воспевая Богу: Аллилуиа.

## Икос 3

---

Имела еси душу, мужеством о Христе преисполненную, Евгение богомудрая: Бога точию боящися, не устрашилася еси тяготы жития иноческаго. Кров же оставльши отчий, Господа молила еси, всехвальная, да скорбь родителей, твоим отшествием учиненная, на радость преложится, да ты Христу послужиши и за рождших тя молишися. Темже тя хвалим достойно:

Радуйся, всем сердцем Спаса Христа возлюбившая.

Радуйся, стезею святых теци восхотевшая.

Радуйся, суету мира сего познавшая.

Радуйся, истины и правды искавшая.

Радуйся, яко к Вышнему течение твое исправила еси.

Радуйся, яко дом и родители твоя Господа ради оставила еси.

Радуйся, нищету возлюбившая.

Радуйся, спасение души обретшая.

Радуйся, земная презревшая, о небесных помышлявшая.

Радуйся, девственнице чистая.

Радуйся, путь иноческаго жития избравшая.

Радуйся, чину иноческому добрый путь преподававшая.

Радуйся, святая преподобномученице Евгение, монашествующих украшение.

#### **Кондак 4**

---

Буря недоумений смущаше тя, святая дево Евгение, еще некрещенной ти сущей, еже како бы получитьи знамения христианския веры. Бог же тайным Своим Промыслом приведе тя во обитель иночествующих, да ту возродишия водою и Духом, и в чистоте сердца, посреде лика иноческаго воспоеши Христу: Аллилуиа.

---

## Икос 4

Слышала еси, мудрая дево Евгение, яже Апостол рече: «глаголю безбрачным и вдовицам, добро им есть, аще пребудут, якоже аз: не оживыйся бо печется, како угодити Господеви!» - сему поревновала еси. Темже со слезами о сем Господа молила еси. Господь же о тебе и сущих с тобою откры святителю Еллию, пришедшему во обитель, и той вы призвав, вопроси тя о именах, роде и отечестве вашем. И ответившей ти: «Нам, о божественная главо, род и отечество есть Рим прекрасный, братия есмы по плоти: имя же первому Прот, другому - Иакинф, аз же Евгением нарицаюся». Исполненный дара прозорливости, святитель глагола: «Вправду Евгением, нарицаешия, о Евгение, образ женск и имя изменив, любве ради Божественныя: блаженни есте такового ради дружества и соединения со Христом!» Таже во имя Пресвятыя Троицы крести вы и во ангельский образ облече. Мы же восхваляем, ты сице:

Радуйся, святым крещением во обители просвещенная.

Радуйся, во святом крещении дарами Святаго Духа исполненная.

Радуйся, яко вольным твоим разумом ко Господу приступила еси.

Радуйся, яко от руки святителя образ иноческий, аще и юна сущи, прияти сподобилася еси.

Радуйся, в нем житие добродетельное старческое показавшая.

Радуйся, иго благое Господне на рамо твое вземшая.

Радуйся, яко усердно последовала еси стопам Христовым.

Радуйся, яко на вся подвиги иноческия уготовала еси душу твою.

Радуйся, в трудех и подвизех рано Господеви послужившая.

Радуйся, образ совершенства явившая.

Радуйся, сообразно монашескому званию жившая.

Радуйся, святая преподобномученице Евгение, монашествующих украшение.

## Кондак 5

---

Боготечней звезде уподобилася еси, преподобная дево Евгение, мир и вся, яже в нем оставила еси, мужескою одеждою и именем прикровенна, в веси, идеже отец твой епарх бысть, в обители неведома добре подвизалася еси, непрестанно воспевая Богу: Аллилуиа.

## Икос 5

---

Видевше братия, сподвижницы твоя, преподобная Евгение, твое мужемудренное и богоугодное житие, всех сущих в монастыре постников несравненно превосходящее, по триех летех жития твоего во иночестве, единомудушно моляху тя прияти начальство. Ты же, ово боящися, да не противу закона, жена сущи, мужами обладати будет, ово же стыдящися толиких честных лиц моление отринути, повелела еси принесену быти святому Евангелию, и егда прочтоша: «Иже кто хочет в вас вящий быти, да будет вам слуга!» - со смирением повинулася еси Христову повелению и со многим усердием для братии служила еси, понуждая всех вопити тебе:

Радуйся, образе жизни духовныя.

Радуйся, естество женское Христа ради  
превозшедшая.

Радуйся, мужески в иноческом звании  
подвизавшаяся.

Радуйся, ум твой и сердце в Бозе молитвенно  
утвердившая.

Радуйся, яко непрестанным бдением  
безплотным поревновала еси.

Радуйся, подвигами твоими всех  
превозшедшая.

Радуйся, усердная и верная воли Христовы  
исполнительнице.

Радуйся, начальство, яко ярем, любви ради  
Христовы приявшая.

Радуйся, премудрая, монахов в подвизах  
наставлявшая.

Радуйся, добрая о братии попечительнице.

Радуйся, благочиния монастырскаго мудрая  
устроительнице.

Радуйся, святая преподобномученице  
Евгение, монашествующих украшение.

## Кондак 6

---

Проповедница и исполнительница Евангельских словес, еже не скривати себе сокровищ на земли, явилася еси, преподобная Евгение: сего ради и братию твою наставляла еси, еже единого Господа искати во вся дни жизни своея, всем сердцем Тому прилепятся и непрестанно пети Ему: Аллилуиа.

## Икос 6

---

Воссия паче солнца богоугодное житие твое, всехвальная Евгение, и якоже звезды небесныя озариша добродетели твоя обитель и окрестности ея: мнози бо наставления и исцеления болезнем от тебе приимаху. От нихже и жена некая, именем Меланфия, богата имением, нища же добрыми делы, призва тя в дом свой, мнимаго ради недуга своего, и видя тя образом юна и лицом красива, не ведущи в мужестем образе и имени таящагося естества женскаго, любодейственными словесы нача прельщати тя, ко греху влекущи, вся своя богатства и саму себе в руке твои вручаючи. Ты же, целомудренная Евгение, о безстудии таковом стыдящися, рекла еси: «Наше богатство есть, еже со Христом убожествовати. О, чистото блаженная, не

продадим тя за тленная богатства! О Мати Божия и Дево, не изменю моих обетов! Един нам брак - желание Христово!» Сим посрамила еси безстудную жену, победив злокозненного врага. За такую ревность чистоты жития иноческаго приими похвалы сия:

Радуйся, ангельское житие явившая.

Радуйся, страсти греховныя уставившая.

Радуйся, немощных целительнице.

Радуйся, целомудрия хранительнице.

Радуйся, образе истиннаго смирения.

Радуйся, зеркало совершеннаго терпения.

Радуйся, приводящая грешных ко исправлению.

Радуйся, крилами богомыслия сети вражия сокрушившая.

Радуйся, мужественным терпением твоим страстей мглу потребившая.

Радуйся, в подвизех дневных и нощных течение жития совершившая.

Радуйся, ризу убелившая девства чистотою.

Радуйся, превозвышенная добровольною ницетою.

Радуйся, святая преподобномученице  
Евгение, монашествующих украшение.

### **Кондак 7**

---

Хотящи верна быти до конца Иисусу Христу,  
Сладчайшему Жениху своему, взявшему грехи  
всего мира, велию кротость, незлобие и  
смирение явила еси, целомудренная Евгение,  
егда безстудная Меланфия, исполнившись  
гнева, оклевета тя епарху в любодействе с нею.  
Во свидетельство рабыни своя представи, и тии  
ко лжи ложь прилагаху, да угодни будут госпоже  
своей. Ты же наносимая тебе поношения,  
укоризны и клевету радостно терпела еси,  
ведуще, яко теми подобает внити в Царствие  
Небесное, идеже со Ангелы вопиеши Богу:  
Аллилуиа.

### **Икос 7**

---

Дивное показала еси мужество и терпение,  
преподобная Евгение, егда повелением епарха,  
отца твоего, емшаго веру ложным словесем  
безстудныя жены, тебе ради все стадо  
иночествующих в темнице заключено бысть.  
Тебе осудиша на смерть предати, иных огнем  
сожещи, других на снадение зверем дати, иных

на древе повесити, прочих различными погубити смертми. То слышавши, горце душею твоею страдала еси и вся разженныя еже на тя стрелы лукаваго молитвою и терпением угасити потщалася еси. Мы же, мужеству твоему дивящися вопием ти:

Радуйся, Небеснаго Отечества пламенне возжелавшая.

Радуйся, возлюбившая Иисусову сладость.

Радуйся, чрез земную темницу в небесный чертог светло вшедшая.

Радуйся, в ней терпением брачную себе одежду исткавшая.

Радуйся, яко тобою от многих ран грешнии исцеляются.

Радуйся, яко тобою от всех болезней с верою ты призывающии уздравляются.

Радуйся, уз греховных скорая решительнице.

Радуйся, язв многоболезненных добрая целительнице.

Радуйся, твердейшая адаманта в терпении невредимом.

Радуйся, крепчайшая каменного столпа в мужестве непоколебимом.

Радуйся, яко со Христом, Его ради, на земли страдала еси.

Радуйся, яко с Ним и о Нем на небеси прославляешися.

Радуйся, святая преподобномученице Евгение, монашествующих украшение.

### **Кондак 8**

---

Странное и страшное бе видение, егда собравшуся множеству народа, прииде епарх Филипп с сынома своима и, седши на обычном судищном месте, нача судити тя, блаженная Евгение, со евнухи твоими и прочими иноками, никакоже яже о тебе тайны ведуци. И бысть от народа вопль: да погублени будите, яко беззаконницы. Повеле же епарх тебе, яко начальника, ближе привести на испытание и вся орудия мучительская предложити, не ведуще тайны, ни еже пети Богу: Аллилуиа.

### **Икос 8**

---

Вся облеклася еси во оружия Божия, преподобная дево Евгение, темже возмогла еси всю силу диаволю низложити: стояла бо еси на

судищи пред отцем твоим и братиею неповинна  
сущи во одежди мужеской иночестей, лице долу  
преклоненно имущи, да не познана от них  
будеши, и грозное прещение на смерть слышала  
еси. Ты же, да не торжествует беззаконие над  
неповинностию и нечестие языческое  
христианскому благочестивому и  
целомудренному иноческому житию да не  
ругается, исповедала еси, яко толика есть сила  
имени Христова, яко и жены, в божественном  
Его страсе живуция, мужескаго достоинства  
сподобляются. Того ради слышиши от нас  
похвалы сия:

Радуйся, прелести мира возненавидевшая и  
единого Бога возлюбившая.

Радуйся, учительнице смирения и  
целомудрия.

Радуйся, яко терпением твоим ангельския  
чины достигла еси.

Радуйся, яко их житию непорочно  
поревновала еси.

Радуйся, яко уневестила еси душу свою  
Жениху Христу.

Радуйся, смирением возвышаема, в вечныя  
кровы возлетевшая.

Радуйся, не устрашившаяся временных мучений.

Радуйся, научающая и нас не бояться человеческих прещений.

Радуйся, о славе имене Христова ревновавшая.

Радуйся, пламенную любовь ко Господу показавшая.

Радуйся, прошения твоя со слезами теплыми Господеви приносившая.

Радуйся, иноческое житие на высоту вознесшая.

Радуйся, святая преподобномученице Евгение, монашествующих украшение.

### **Кондак 9**

---

Все естество Ангельское велиею возрадовася радостию, узревши мужественную крепость твою, преподобная Евгение, и удивишася, како жена сущи, в мужестем образе среди лика иноков подвизаешися, и неповинне наносимую клевету терпяще, за вся благодарне Богу поеши: Аллилуиа.

---

## Икос 9

Витии многовещаннии недоумеют достойно восхвалити тя, преподобная дево, паче бо естества человеческого подвизалася еси в чине иночестем и любви ради его открытися на суде изволила еси: раздрав свыше одежду, показала еси себе быти женска пола и, обращя к епарху, рекла: «Ты мне отец по плоти, Клавдия же мать моя, а с тобою сидящии Авит и Сергей братия ми суть, аз же Евгения, дочь твоя, яже любви ради Христовы, мира и всех его сластей отвергохся!» Мы же, любовью подвигаеми, со слезами вопием тебе сице:

Радуйся, ревнительнице славы имене Божия.

Радуйся, любительнице уставов жития иноческаго.

Радуйся, ревностная их исполнительнице.

Радуйся, яко плоть твою духови покорила еси.

Радуйся, яко во бденных молитвах неослабно пребыла еси.

Радуйся, яко умерщвлением плоти безстрастие стяжала еси.

Радуйся, всякое наслаждение земное возненавидевшая.

Радуйся, тесным и прискорбным путем ходившая.

Радуйся, яко язвы Господа Иисуса Христа на теле носила еси.

Радуйся, яко силою креста Господня демонския козни сокрушила еси.

Радуйся, вышних присно искавшая.

Радуйся, мысленным оком к Невечернему Свету Христу непрестанно взиравшая.

Радуйся, святая преподобномученице Евгение, монашествующих украшение.

### **Кондак 10**

---

Спасти хотя многия и обратити ко Христу, обличила еси клевету, на стадо твое наносимую, и истину со смирением открыти о себе изволила еси. Отец, мати и братия твоя, познавше тебе, возсташа абие с мест своих, с неизреченною радостию и слезами притекше, падоша на выю твою, объемяюще, лобызающе, плачуще от радости и веселящиеся о внезапном обретении твоём. Народ же, на то смотря, удивляшеся и воздвигши глас, взываше: «Един Христос! Един

истинный Бог христианский!» Емуже ты всех научила еси пети: Аллилуиа.

## **Икос 10**

---

Стена твердая и крепкое ограждение иночествующим и всем православным явилася еси, преподобная Евгение: тобою бо неповинно терпящии иноцы от уз разрешени быша, и яко Христовы истиннии раби, от всех почитаеми, во обитель свою возвратишася. Безстудную клеветницу суд Божий постиже: еще бо сущей ей на позорищи: огонь с неба на дом ея паде и со всем ея богатством сожже. И не токмо во Александрии, но и во всей стране Египетской благочестие процвете и мир церкви Христовой возвратися. Отец твой Филипп, отложив сан епаршеский, епископ бысть и со славою мученическою на небеса преселися. Ты же, собравши к себе христианския девицы, добре Господеви работала еси, подвизая нас вопити тебе:

Радуйся, светом трисиянным Пресвятая Троицы озаренная.

Радуйся, за истину православия многи труды и подвиги подъявшая.

Радуйся, образе истинного смирения.

Радуйся, зеркало истинного самоотречения.

Радуйся, звездо во тьме греховней заблудшим  
светящая.

Радуйся, лестнице, последующих ти по  
ступенем добродетелей от земли на небо  
возводящая.

Радуйся, яко благою жизнью твоею образ  
терпения и смиренномудрия нам явила еси.

Радуйся, яко к небесному свету многих  
направила еси.

Радуйся, яко тьму суеверия прогнала еси.

Радуйся, яко жития чистотою сердца наша  
просветила еси.

Радуйся, иноков, добре подвизающихся,  
молитвенная пред Богом предстательнице.

Радуйся, ко спасению тех добрая  
руководительнице.

Радуйся, святая преподобномученице  
Евгение, монашествующих украшение.

## Кондак 11

---

Пение хвалебное возсылала еси Царю Славы, Небесному Жениху твоему, мудрая дево Евгение, преселившись с матерью и братьями твоими в отечество свое - Рим прекрасный, тамо Церковь Божию, аще и посреде гонения, аки крин посреде терния, умножила еси. Ты бо многия девицы, мати твоя - жен, а блаженнии евнухи Прот и Иакинф - юнош множество Богу приобретаюша, их же тайно святитель Корнилий крестил, совершая Божественную Литургию в дому твоем, причастия Тела и Крове Христовой сподоби, вопиющих Богу: Аллилуиа.

## Икос 11

---

Светоприемной свеще уподобилася еси, святая Евгение, целомудренным твоим житием многия девицы ко Христу обратила еси, поучая их, яко девство есть первейшее приближение к Богу, Ангелом подобно, мать вечныя жизни, путь к небеси безбедный, согрешение и венец веры. Таже и увещевала еси их в девстве непорочном пребывать, а еще преславнее девства ради умерети. Сему учению последуя, и девица некая от колена царска, по имени Василла, остави жениха своего и крещение

прият, в заповедех Божиих живяше, и сего ради заповедь царска дадесе, да вси христиане убиваемы будут. Девица Василла, велегласно исповедовавшая Небеснаго Жениха своего, мечем бысть заклана, блаженнии евнухи обезглавлени быша. Ты же преподобная дево, яко обращению многих виновная, ко многим мукам ведома была еси. Мы же на сем пути сретаем тя приветствии сими:

Радуйся, свеще Божия ревности, елеем милости исполненная.

Радуйся, цветом нетления украшенная.

Радуйся, во смирении твоём на земли и на небеси дивно возвеличенная.

Радуйся, чистотою сердца боговидения сподобившаяся.

Радуйся, адаманте, перстень безсмертнаго со Христом обручения украсивший.

Радуйся, венче доброты, в руке Господней держимый.

Радуйся, в подвизех неутомимая.

Радуйся, всенощныя молитвы и бдения усердно совершавшая.

Радуйся, преподобнии твои руке к Богу  
воздвизавшая.

Радуйся, многия люди Христу тобою  
уверовавшии, Богу примирившая.

Радуйся, верная руководительнице  
шествующих ко Господу путем тесным  
иноческаго жития.

Радуйся, лестнице, возводящая богомудрых  
иноков на высоту совершенства.

Радуйся, святая преподобномученице  
Евгение, монашествующих украшение.

## **Кондак 12**

---

Благодать от Бога дана ти бысть, святая  
преподобномученице Евгение, тою бо ты,  
приведена во храм идольский, храм со идолы  
сокрушила еси; ввержена в реку Тибр, камнем  
при выи обвязана, по водам, яко по суху, ходила  
еси; в печи огненной невредима пребыла еси;  
таже в рове глубоце и мрачне, чрез десять дней  
морима гладом, сохранилася еси. Во утешение  
явился тебе Господь наш Иисус Христос,  
глаголяй: «Аз есмь твой Спаситель, Егоже ты  
всем сердцем возлюбила еси и страждеши Мене  
ради. Аз убо тебе многою одею славою и

многими исполню увеселеньми. Да будет же и сие знамение чести твоея, яко в той ты день прииму в небесная селения, в онъ же Аз на земли от чистыя Девическия произыдох утробы!» Ты же, исполнившись радости неизреченныя о Христе Иисусе, воспевала еси: Аллилуиа.

## **Икос 12**

---

Поюще твоя крепкия подвиги, почитаем страдания твоя, хвалим долготерпение твое, ублажаем твою кончину, юже прияла еси в самый день Христова Рождества, прославляем твое, в женском естестве показавшееся непобедимое мужество, имже на земли и на небеси прославилася еси, святая преподобномученице Евгение, и твоих ради победоносных подвигов и страданий похвальная восписуем ти сия:

Радуйся, мученическое течение твое мечною кончиною добре завершившая.

Радуйся, во гласе пения ангельскаго на небо душею твоею воспарившая.

Радуйся, мученический полк на небесех возвеселившая.

Радуйся, преподобных лик возрадовавшая.

Радуйся, постническое житие и мученическую кончину в себе сочетавшая.

Радуйся, яко неисцельныя болезни скоро исцеляеши.

Радуйся, болезни хотящим терпети помощь дарствующая.

Радуйся, яко на подвиг долготерпения твоего зряще, малодушия нашего устыждаемся.

Радуйся, яко мужество твое воспоминающе, воинствовати на плоть подвизаемся.

Радуйся, во утешение плачущей матери своей, блаженней Клавдии, во славе велицей явившаяся.

Радуйся, яко той благую весть о ея праведней кончине и о причтении всего рода своего благородного к лику святых известившая.

Радуйся, всем, во иночестве благоскорбящим, подательнице вечнаго радования.

Радуйся, святая преподобномученице Евгение, монашествующих украшение.

### **Кондак 13**

---

О, всехвальная святая преподобномученице Евгение! Нынешнее наше моление приемши, от

всякия болезни, напасти, клеветы человеческия и от враг видимых и невидимых нас избави, да тихое и мирное житие поживше во юдоли земной, блаженство райское на небеси наследим и купно с тобою сподобимся Святых Святейшему Слову выну воспевати песнь: Аллилуиа.

(Этот кондак читается трижды, затем икос 1 и кондак 1)

### **Молитва**

Девственниц похвало и мучениц славо, Евгение преподобная! К тебе во умилении сердец припадаем и заступления твоего у Господа просим! Ты бо, преподобномученице преславная, велие дерзновение ко Владыце всех стяжала еси, яко прославившая Его в чистой душе твоей и телеси твоём страдальчестем, зане, вся прельщения врага и прещения мучителя презревши, вся терпящи, вопияла еси: «Христос есть богатство мое и похвала!» Темже от того богатства и нашей нищете духовная подаждь дарования и от безмерных прегрешений нас предстательством твоим огради, друг ко другу нас в послушании и братолюбии настави и ко Господу очи сердец наших всегда возводи, во

еже присно славити нам Отца и Сына и Святаго Духа державу и твое теплое предстательство во веки веков. Аминь.

